

Duzgungq Iq Bok Naeng

贵港市覃塘区蒙公镇高占小学四年级 Leiz Cinyez/雷振越



Ngoenz singhgiz, nditrongh raeujrub, gou sij cozyez sat le, daeuj daengz conghcueng yawjyawj duzgungq iq gou ciengx youq ndaw buenzraemx haenx.

Gou lejlej youq henz buenzraemx roqroq song mbat. Yi, duzgungq iq baenzlawz mbouj lumj bingzciengz ityiengh “fw” diuq hwnj-daeuj, youq ndaw buenzraemx youz bae youz dauq, seizneix de baenzlawz mbouj ning saekdi ne? Gou youh yungh ga dawh bae dod de, de lij dwg caemrwgrwg, gou gamjdaengz gig geizgvaig, couh loeg de hwnjdaej, aen ndang de unqnemnem. Gou sijsaeq baez yawj, dwg naeng gungq, mbwn ha, nanzdauh duzgungq dai bae la? De deng gijmaz doenghduz gwn ndaw bae la?

Gou siengsim dwk dawz de cuengq haeuj ndaw buenzraemx bae, raemx baez doengh, go'nywj raemx baihlaj couh diuq ok doenghduz

nde. Dwg gijmaz ne? Gou byaengq hung lwgda, menhmenh biengj hai go'nywj raemx, yi, baenzlawz youh miz duzgungq iq ndeu ne? Hung iq caeuq duz gaxgonq ca mbouj geijlai, de hix mbouj ning saekdi boemz youq henz go'nywj raemx.

Gou siengj hwnj swgheij youq gwnz bonjsaw ndaej daengz cihsiz: Duzngwz, duzgungq daengj doenghduz haenx, moix bi cungj aeu bok naeng baez ndeu. Seizneix, gou mingzbeig lo, gyamq haxbaenh gou yawjraen dwg duzgungq bok, caencingq duzgungq dwg ndoj youq gizneix ne!

Doenggvaq gienh saeh neix, gou rox ndaej daengz, aeu lai doeg saw, cijaeu hawj aen ukgyaeuj swgheij rim hwnjdaej, cijndaej gejhai aen nanzdae youq ndaw swngghoz.

(lauxsae son'gyauq: Cinz Cinhdonz/覃珍团)

Hag Cauj Haeux Gyaux Gyaeq

Ngoenzneix banringz, gou caeuq daxbuz hag cau haeux gyaux gyaeq.

Gou sien dawz geij aen gyaeggaeq caeuq aen vanj hoengq ndeu daej, caepcawq “dub gyaeq”. Gou aeu gyaeggaeq lejlej roq roengz bak vanj bae, byukgyaeq ngamq mboep didi, caiq yunghrengz roq baez ndeu, byukgyaeq couh buq lo. Gou siujsim yupyup mbekhai byukgyaeq, “bu” singq ndeu, gyaeqhau caeuq gyaeqhenj doengzcae doek roengzbae, cwxcailh ninz youq gyang vanj lo.


Ciep roengzdaeuj couh aeu “hoed gyaeq” lo! Gou fwngzswix gaem vanj, fwngzgvaz gaem dawh, aeu dawh mboujdingz bae gyaux gyaeq, fatok gij singyaem hoed gyaeq “daddaddad” daej. Mbouj geij nanz, gyaeqhau caeuq gyaeqhenj couh doxyungz caezcaemh lo.

Seizneix, hainduj cau gyaeq. Daxbuz hai feiz, ndingq lau roengz ndaw rek bae. Gvaq le geij miux, daxbuz son gou dawz gij gienghgyaeq hoed ndei haenx ndingq roengz rek bae, cij dingqny “sa” singq ndeu, gienghgyaeq sikhaek sanq baenz aen “bingjluenz” henjgim ndeu, seiqhenz de lij “cwcw” bongz baenz aen bop iq dem. Miz geij diemj raemx gienghgyaeq sinz hwnj-daeuj, youq gyang rek mbouj dingz yatyet hwnjroengz. Gvaq yaep he, couh miz heiqrang coemjnaj lo. Daxbuz heuh gou canj suenz aen bingjgyaeq, yienzhauh cang roengz vanj bae.

Mwhneix, daxbuz youh dauqcungz hai feiz coq rek, roengz lau, caiq ndingq gij haeux bwh ndei haenx roengzbae, hainduj

cauj haeux. Gij naedhaeux nem lau le, bienq ndaej ronghrikrik liux, gvaig mbouj ndaej gyoengqvunz aeu naeuz “haeuxcaw” ne! Yienzhauh gou gya roengz gij gyaeq cau ndei haenx, fan cau ndaej yinz bae. Va, couh lumj naedcaw vanq hwnj gimsoiq nei, ndei yawj lailai. Doeklaeng roengz sieg gyu caeuq di coengsoiq he, cau yinz, daek hwnj cang buenz. Bueuz haeux gyaux gyaeq homfw youh ndei yawj ndeigwn ndeu couh guhbaenz lo.

(Cauh Yiyinh raiz Ouh Caijfangh hoiz)



Caeuq Fwjndaem Beij Buet



Haemh singhgizroek hag diuqfoux liux le, gou caeuq daxmeh byaij youq gwnz roen dauq ranz. Seizneix, daxmeh vix fwj lwnh gou: “Mwngz yawj, fwjndaem gwnz mbwn laepngauj nei, yaek doek fwn lo.”

Gou ngiengx gyauej yawj-yawj, faj dam faj fwjndaem cingq vaiqvaiq buet baenaj. Gou caeuq daxmeh gietdingh caeuq fwjndaem beij buet. Yienghneix le, dou youq gwnz roen haenqrengz buet dauq ranz.

Ngamq daengz ranz, couh ndaej nyi sing yiengj hih-lihvahlah. Gou yawj le rog cueng, fwn doek hung lumj buenz dauq raemx lo.

Dou caijsoq ndei dahraix bw!
(Vuz Cinzhih)